

Newspaper	BERITA HARIAN
Date	30 SEPTEMBER 2016

'Dakwaan Dr M Malaysia menuju kegagalan jauh tersasar'

BH- 30/9/2016

Putrajaya: Kejayaan lawatan kerja Perdana Menteri, Datuk Seri Najib Razak ke Jerman minggu ini membuktikan dakwaan Tun Dr Mahathir Mohamad kononnya Malaysia menuju kegagalan, jauh tersasar.

Pengarah Komunikasi Strategik Barisan Nasional (BN), Datuk Abdul Rahman Dahlan, berkata serangan Dr Mahathir yang semakin menjelikkan sejak kebelakangan ini, berkemungkinan besar mahu menutup rasa malu itu.

"Tun Dr Mahathir bukan saja membandingkan Perdana Menteri dan semua yang berada dalam kerajaan sebagai 'Nazi', tetapi melakukannya ketika Perdana Menteri berada di Jerman.

"Jerman sudah menebus masa silamnya dan membina demokrasi yang menjadi contoh kepada banyak pihak, maka tidak wajar untuk menghina sebuah negara dan mengungkit sejarah lampaunya yang memeritkan semata-mata untuk mendapat kelebihan politik.

Aibkan negara

"Sekali lagi, Dr Mahathir menunjukkan beliau bukan negarawan dan telah mengaibkan Malaysia," katanya dalam satu kenyataan di sini, semalam.

Beliau berkata, Dr Mahathir menyebabkan rasa meluat dan bersalah di Jerman, yang mana pada tahun lalu adalah pelabur terbesar Eropah di Malaysia.

Abdul Rahman mengulas kenyataan Dr Mahathir di *blog chedet.cc* baru-baru ini mendakwa penggiat media sosial yang membela Najib sama seperti Goebbels Kecil (Little Goebbels) kononnya diberi rasuah untuk mempamerkan imej mulia Najib.

(Joseph Goebbels, adalah orang kanan Adolf Hitler yang ditugaskan menjalankan kerja-kerja propaganda Nazi)

Sementara itu, **BERNAMA** melaporkan Menteri Komunikasi dan Multimedia, Datuk Seri Dr Mohd Salleh Said Keruak, berkata adalah ironi bagi Dr Mahathir menuduh penyokong Najib sebagai Goebbels Kecil, sedangkan beliau sendiri dirujuk sebagai 'Hitler' semasa eranya.

Malah, Salleh berkata, mereka yang pernah bekerja untuk Dr Mahathir ketika beliau menjadi Perdana Menteri diumpamakan sebagai Goebbels.



Tun Dr Mahathir bukan saja membandingkan Perdana Menteri dan semua yang berada dalam kerajaan sebagai 'Nazi', tetapi melakukannya ketika Perdana Menteri berada di Jerman"

Abdul Rahman Dahlan
Pengarah Komunikasi Strategik BN